

Inkesta soziolinguistikoa egiteko eskaria

NAFARROA BAI-K mozioa aurkeztu du Nafarroako Parlamentuan eta Gobernuari eskatu dio Eusko Jaur-laritzak eta Euskararen Erakunde Publikoak (EEP) bost urtean behin egiten duten inkesta soziolinguistikoa egiteko. 1990eko hamarkadan egindako bi inkestetan Nafarroako Gobernuak parte hartu zuen, baina 2002az geroztik ez. Inkestak bere kabuz egingo zituela erantzun zuen, beste metodologia bat erabilita. NaBairen ustez, Jaur-laritzak eta EEPk egiten duten inkesta da eus-

kararen egoera ondoen erakusten duen metodoa. UPN ezik beste alderdi guztiek baiezkoa eman dute.

Agote Sariak Farmaziako hiru irakaslerentzat

EHUKO Farmazia Fakultateko lau irakaslerentzat izan da Osasungoa Euskalduntzeko Erakundeak ematen duen Agote Saria. Jon Zarate, Monica Gallego, Enrique Etxebarri eta Oscar Casisentzat da saria, *Giza Fisiologia Farmazialarientzat* lanagatik. EHUKO Giza Fisiologia Farmazia Fakultateko 2. mailako ikasleentzako prestatu dute lana lau irakasleek.

BAHEA

Benito Fizek [karrajua.org-en esanak](http://karrajua.org-en-esanak): “Euskara ikasteko denbora luzatuz joan dela pentsa daiteke. Arrazoiak egongo dira, eta ez dut uste arrazoi komertzialak izan direnik. 80 orduan ikastera ez gara helduko, ez gu ez inor, baina efizientzia neurgailu jartzan badira, oraingo denborak zelan murriztu pentsatu beharko litzateke akaso.

Ikasteko denbora laburtu, ez ikastaroen luzera bakarrik, noski”.

Koldo Izagirrek [Berrian](#) esanak: “ETArik ez egoteak, edo babes politikorik gabeko ETA azkendu bat egoteak arazoak ekarriko dizkio estatuaren estrategia klasikoa-ri. Orduan ETAREN ordezkari bat bilatu beharko du. Nola aurkitu dute islamismoa gaitz guztien ama, behialako komunismoaren ordezkari? Bada, terrorismoaren ordezkari euskara hartuko dute, euskararen inposaketa, elebarkarra itzuli nahi dugun kabernikolak, hizkuntzaren diktadura, gaztelaniaganako gorrotoa... Hizkuntza gatazkak sortu eta asmatuko dituzte beren demokratikotasun ezin moralagotik inposaketa indartzeko”.

Mertxe Rodriguez [Marimototsek](#) [HABE](#) aldizkarian esanak:

“Koadrilako harremana gaztelaniaz zen. Euskaltegitik bueltan hasi nintzen pixkanaka euskaraz hitz egiten, kostata. Baina bazen koadrilan neska euskaldun bat, andereño zena Iruñean. Oso ohituta zegoen bera euskaraz egiten eta erantzuna gaztelaniaz jasotzen eta orduan berarekin honela egiten nuen. Berak beti euskaraz egiten zidan eta nik erdaraz erantzun. Horrela hasi nintzen. Halako batean, konturatu gabe buelta ematen diozu horri eta euskaraz erantzuten hasten zara, modu naturalean”.



Honelako albisteak egunero irakurtzeko, jaso hari@DOAN e-postaz: www.argaia.com/harpidetza_haria.php

TALAIAN

Merkelek inposatutako soldatak

Angela Merkel bozeramale eta Nicolas Sarkozy txotxongilo dituztela, “Merka-tuek” pentsioen erreforma inposatu dute, eta orain negoziazio kolektiboaren ordua iritsi da. Erreforma horren barruan soldatak sartzen dira. Merkelek argi utzi zuen bere posizioa, gainerako Europar Batasunarentzat (EB) ezarri nahi duena, bestalde. EBn Lehiakortasunerako Ituna negoziatzen ari dira, sei punturen inguruan: soldatak inflazioaren arabera igo behar direla esaten duen tesia utzi eta hauek produktibitateari lotzea; konstituzioetan zorraren eta defizitaren mugak sartzera; lan mugikortasuna erraztea; jubilazio adina bilakaera demografikoaren arabera atzeratzea; elkarleen gaineko oinarritzko zerga harmonizatzea; eta banka-krisiak konpontzeko mekanismoa ezartzea.

Espainiako Estatua inposatu dizkieten etxeko lan horiek betetzen hasi da: lan eta pentsioen erreformak. Eta orain negoziazio kolektiboaren erreforma hasiko da, soldatak ezartzeko modua barnean duela. Merkelek, Sarkozyren laguntzarekin, jadanik esana du zer egin behar den eremu horretan. Soldatak enpresaren produktibitateari lotu behar dira, eta ez inflaziora, orain arte bezala. Berehalakoan, Espainiako Bankuak, CEOEK, BBVAK, Espainiako Gobernuak eta EAJK –Bilbaok hitz egin baitzuen–, Merkelen errezeta bere egin dute, eta sindikatuei inposatzen saiatzen ari dira. CCOOK eta UGTk, beti bezala, “ezta pentsatu ere” esan dute, hortik ez direla pasako. Eta gogorarazi dute Espainiako Estatuan paktaturiko ereduak inflazioaren aurreikuspen harmonikoa, berrikuspen klausula eta produktibitatearen banaketa negoziatua jasotzen dituela. Bada, sindikatu horiek, jubilazioa 67 urtera atzeratetik ez zirela pasako ere esan zuten. Eta pasa ziren! Eta irribarretsu, Borboi Erregearen ondoan argazki ateratu zuten. Eta orain ere pasako dira soldatekin, eta bihar osasungintzako kopagoarekin. Bitartean, euskal langileek Madril eta Parisen menpe egotearen ondorioak jasaten jarraituko dute.

Juan Mari Arregi